



МОНГОЛ УЛСЫН  
БАТЛАН ХАМГААЛАХЫН САЙДЫН  
ТУШААЛ

2021 оны 04 сарын 30 өдөр

Дугаар А/103

Улаанбаатар хот

Журам батлах тухай

Монгол Улсын Засгийн газрын тухай хуулийн 24 дүгээр зүйлийн 2, Батлан хамгаалах тухай хуулийн 15 дугаар зүйлийн 15.1 дэх хэсэг, Зэвсэгт хүчний тухай хуулийн 13 дугаар зүйлийн 13.1.12 дахь заалтыг тус тус үндэслэн ТУШААХ нь:

1. Батлан хамгаалахын сайдын дэргэдэх Иргэний зөвлөлийн ажиллах журмыг хавсралтаар баталсугай.

2. Батлан хамгаалахын сайдын дэргэдэх Иргэний зөвлөл нь үйл ажиллагаагаа олон нийтэд сурталчлан таниулах, эрх, үүргээ хэрэгжүүлэхэд дэмжлэг үзүүлж, хамтран ажиллахыг Батлан хамгаалахын дэд сайд /Б.Баярмагнай/, Зэвсэгт хүчний Жанжин штабын дарга /хошууч генерал Д.Ганзориг/-д тус тус үүрэг болгосугай.

3. Энэхүү тушаал гарсантай холбогдуулан Батлан хамгаалахын сайдын 2008 оны "Заавар батлах, томилох тухай" 430 дугаар тушаалыг хүчингүй болсонд тооцсугай.

4. Тушаалын хэрэгжилтэд хяналт тавьж ажиллахыг Батлан хамгаалахын Ерөнхий хянан шалгагч /хурандаа Ж.Болдбаатар/-д даалгасугай.

САЙД



Г.САЙХАНБАЯР

1321100245

Батлан хамгаалахын сайдын 2021 оны  
04 дүгээр сарын 30-ны өдрийн  
А/103 дугаар тушаалын хавсралт

## БАТЛАН ХАМГААЛАХЫН САЙДЫН ДЭРГЭДЭХ ИРГЭНИЙ ЗӨВЛӨЛИЙН АЖИЛЛАХ ЖУРАМ

### Нэг. Нийтлэг үндэслэл

1.1. Батлан хамгаалахын сайдын дэргэдэх Иргэний зөвлөл /цаашид “Зөвлөл” гэх/-ийн үйл ажиллагааг энэ журмаар зохицуулна.

1.2. Зөвлөлийн үйл ажиллагааны үндсэн зорилго нь Зэвсэгт хүчинд тавих иргэний хяналтыг хэрэгжүүлэхэд Батлан хамгаалахын сайдад дэмжлэг үзүүлэх, цэрэг-иргэний харилцааг бэхжүүлэхэд оршино.

1.3. Зөвлөл үйл ажиллагаандаа хууль дээдлэх, шударга, ил тод, нээлттэй, хараат бус байх зарчмыг баримтална.

1.4. Зөвлөл нь үйл ажиллагаандаа Монгол Улсын Үндсэн хууль, Монгол улсын Батлан хамгаалах тухай, Зэвсэгт хүчний тухай, Цэргийн албаны тухай, Цэргийн алба хаагчийн эрх зүйн байдлын тухай, Гэмт хэргээс урьдчилан сэргийлэх тухай хууль болон бусад хууль, тогтоомж, хүний эрхийн олон улсын гэрээ, конвенц, энэ журмыг удирдлага болгоно.

### Хоёр. Зөвлөлийн бүрэлдэхүүн, зохион байгуулалт

2.1. Зөвлөл нь 9 хүний бүрэлдэхүүнтэй байна.

2.2. Зөвлөлийн даргыг анхны хуралдаанаар зөвлөлийн бүрэлдэхүүнээс нэр дэвшүүлэн олонхын саналаар сонгоно.

2.3. Зөвлөлийн үйл ажиллагааны үндсэн хэлбэр нь хуралдаан байна. Зөвлөл шаардлагатай тохиолдолд төрлийн цэргийн командлал, цэргийн нэгтгэл, ангид ажиллаж болно.

2.4. Ээлжит болон ээлжит бус хуралдаан, цэргийн нэгтгэл, ангид ажиллах ажлын тов, хэлэлцэх асуудлын төлөвлөгөөг нарийн бичгийн дарга хуралдаан эхлэхээс 7 хоногийн өмнө гаргаж, гишүүдэд мэдэгдэнэ.

2.5. Зөвлөл нь Батлан хамгаалахын сайдын бүрэн эрхийн хугацаанд ажиллах бөгөөд түүнд үйл ажиллагаагаа тайлагнана.

### Гурав. Зөвлөлийн чиг үүрэг

3.1. Зөвлөл нь дараах чиг үүргийг хэрэгжүүлнэ:

3.1.1. зэвсэгт хүчин дэх хууль тогтоомжийн хэрэгжилттэй танилцах, түүнийг сайжруулах чиглэлээр санал, зөвлөмж гаргах;

3.1.2. зэвсэгт хүчинд тавих иргэний хяналтыг хэрэгжүүлэхэд иргэдийн оролцоог хангах санал, зөвлөмж гаргах;

3.1.3. хүний эрхийг хамгаалах чиглэлээр Монгол Улсын олон улсын гэрээ, конвенцоор хүлээсэн үүргийн талаар санал, зөвлөмж гаргах;

3.1.4. зэвсэгт хүчний үйл ажиллагааны талаарх олон нийтийн санаа бодлыг судалж, мэдээлэл боловсруулан Батлан хамгаалахын сайдад уламжлах;

3.1.5.батлан хамгаалах, Зэвсэгт хүчний үйл ажиллагааг олон нийтэд сурталчлах, хүүхэд, залуучуудыг цэрэг-эх оронч үзлээр хүмүүжүүлэх арга хэмжээг зохион байгуулж, явуулах;

3.1.6.хугацаат цэргийн алба хаагчдын ар гэр, гэр бүлтэй цэргийн нэгтгэл, ангийн удирдлагыг холбох, хамтын ажиллагааг бэхжүүлэх;

3.1.7.гэмт хэрэг, зөрчлөөс урьдчилан сэргийлэх, сахилга дэг журмыг бэхжүүлэх зөвлөлтэй хамтран ажиллаж, үйл ажиллагаанд нь дэмжлэг үзүүлэх.

### **Дөрөв. Батлан хамгаалах яамны хүлээх үүрэг**

4.1.Батлан хамгаалах яам нь Зөвлөлтэй хамтран ажиллах талаар дараах үүргийг хүлээнэ:

4.1.1.зөвлөлийг албаны өрөө, шаардлагатай техник хэрэгслээр хангах, үйл ажиллагаанд шаардагдах зардлыг санхүүжүүлэх

4.1.2.хууль, тогтоомжийн хүрээнд Зөвлөлийг шаардлагатай мэдээ, мэдээллээр хангах;

4.1.3.зөвлөлийн хуралдаанаас гарсан зөвлөмж, санал, дүгнэлтийн хэрэгжилтийг ханган ажиллах, хэрэгжүүлэх боломжгүй гэж үзсэн тохиолдолд шалтгаан, үндэслэлийг зөвлөмжид заасан хугацаанд нь эргэж мэдэгдэх;

4.1.4.Зөвлөлийн даргын хүсэлтээр яам, Зэвсэгт хүчний Жанжин штаб, төрлийн цэргийн командлал, цэргийн нэгтгэл, ангийн холбогдох албан тушаалтныг Зөвлөлийн хуралдаанд оролцуулах.

4.2.Зөвлөлийн нарийн бичгийн даргаар Батлан хамгаалахын Ерөнхий хянан шалгагчийн Ажлын албанаас нэг ажилтныг Төрийн нарийн бичгийн даргын тушаалаар томилон ажиллуулна.

### **Тав. Зөвлөлийн үйл ажиллагааны санхүүжилт**

5.1.Зөвлөлийн үйл ажиллагаанд шаардагдах зардлыг Батлан хамгаалахын сайдын төсвийн багцаас санхүүжүүлнэ.

---oOo---